


DISSERTATIO INAUGVRALIS MEDICA  
DE  
LIPOTHYMIA  
HAEMORRHAGIAM SISTENTE



QVAM

DIVINIS SVB AVSPICIIS  
CONSENSV ET AVCTORITATE  
GRATIOSI MEDICORVM ORDINIS  
IN VNIVERSITATE NORICO - ALTORFINA

PRO GRADV  
DOCTORIS IN MEDICINA  
LEGITIME IMPETRANDO

D. XXIII JVNII A. R. S. MDCCLXVII

SOLENNI ET PVBLICAE DISQVISITIONI

EXPONIT

GOTTLOB IOHANNES GEORGIVS  
WILHELMVS GMELIN

GOCHSHEMIO • WVRTEMBERGENSIS.



ALTORFII

LITERIS HESSELIANIS

THE UNIVERSITY OF CHICAGO

LIBRARY

PHYSICS

1911

THE UNIVERSITY OF CHICAGO

LIBRARY

PHYSICS

1911

LIBRARY

PHYSICS

THE UNIVERSITY OF CHICAGO

LIBRARY

PHYSICS

1911

THE UNIVERSITY OF CHICAGO

LIBRARY

**VIRO**

**ILLVSTRI EXPERIENTISSIMO EXCELLENTISSIMOQVE**

**D O M I N O**

**ERNESTO CONRADO**

**DE BRODBECK**

**MEDICINAE DOCTORI CELEBERRIMO**

**EMINENTISSIMI CARDINALIS  
ET EPISCOPI SPIRENSIS**

**CONSILIARIO INTIMO ET ARCHIATRO PRIMARIO**

**AC CIVITATIS IMPERIALIS SPIRENSIS**

**PROTOPHYSICO MERITISSIMO**

**DOMINO PATRONO**

**AC**

**COGNATO SVO**

**OMNI HONORIS ET PIETATIS CVLTV VENERANDO**



**HOC SPECIMEN INAUGURALE**  
**IN**  
**GRATISSIMI ANIMI TESTIMONIUM**  
**ET**  
**REVERENTIAE DOCUMENTUM**  
**CUM VOTO**  
**PERPETVAE ET OMNIGENAE FELICITATIS**  
**D. D. D.**

**TANTI NOMINIS**

**DEVOTVS OBSERVANTISSIMVSQVE CVLTOR**

**G. I. G. W. GMELIN.**



DISSERTATIO MEDICA  
DE  
L I P O T H Y M I A  
HAEMORRHAGIAM SISTENTE.



§ I.

**N**on raro accidit, ut morbus morbo, symptoma sym- *Thematic*  
ptomati sit remedio. Alii non pauca huius argu- *ocasio.*  
menti dederunt exempla. Mihi vero novum sugges-  
sit specimen casus quidam, notatu haud indignus, quem me-  
cum benevole communicavit Spectatissimus Dominus Decanus,  
Doctor WEISSIVS. Nuper enim rustici cuiusdam uxor, quam  
dira vexaverat odontalgia, immanium impatiens dolorum, den-  
tem molarem a Chirurgo evelli passa est. Exinde vero in tantam  
tamque pertinacem incidit maxillae haemorrhagiam, ut per  
diem noctemque copiosum expueret sanguinem, continuo ri-  
vulo



vulo e lacerata maxillae foveola profluentem. Varia quidem, at incassum, applicabantur remedia, sanguinis fluxum sistentia. Tandem de vita servanda desperans, atque vitali humore nimis exhausta, subito concidit moribunda in terram, gravi prehensa animi deliquio. Illitis tamen spirituosus refocillata ab adstantibus, lectoque rursus imposita, animam recepit fugientem, adeo felici eventu, ut omnis statim quiesceret sanguinis e maxilla fluxus, et alimentis refecta paullatim ad pristinam melioremque rediret valetudinem. Haec me commovit observatio, ut animo mecum constituerim, speciminis inauguralis loco, in eas inquirere causas, ex quibus fieri soleat, ut lipothymia subinde haemorrhagiam sistere valeat.

## § II.

*Exempla.*

Non adeo infrequentes contingunt casus, quibus per experientiam docemur, sanguinis fluxum a supervenientibus animi deliquiis cohiberi. Quoties enim non accidit, ut a Venae sectione animus deficiat, atque sanguis, ex inciso venae vulnuscule alacriter antea profiliens, nunc illico subsistat? Pari modo fieri novimus, fauciatos, postquam multum cruoris e vulnere minus lethali perdiderunt, in lipothymiam incidere, fluxumque sanguinis inde aut desinere, aut facilius coërceri. Milites in praeliis vulnerati, profuso largiter sanguine, tandem lipothymici prosternuntur in arenam, sensuumque inopes trucidatis mortuisque immixti, iacent aliquandiu immoti, donec vulnere per coagulum cruoris subsistentis conglutinato paullatim ad se redeunt. Haec aliaque satis testantur exempla, lipothymiam saepe suboriri ex haemorrha-

morrhagia, atque vicissim hanc non raro illius ope minui ac refrænari.

### §. III.

Antequam ad eruendas horum eventuum causas progrediar, necesse est, ut tam lipothymiae, quam haemorrhagiarum, formam brevibus depingam. Lipothymia ex idea nominis, quod graecae est originis, denotat animi defectionem, quam Latini deliquium appellitant. In eadem vero definienda Auctores non parum a se invicem recedunt. Alii enim ad causas, alii ad partem affectam seu subiectum primarium, alii denique ad effectus huius passionis, attentius respiciunt. Primam eius lineam ducturus, generatim lipothymiam (eine Ohnmacht) describo, quod sit vel morbus, vel quod saepius evenit, symptoma, aliis morbis accedens, in quo tam sensus, quam motus voluntarii, in primis vero pulsus, subito et ad breve tempus remittuntur. *Lipothymia quid?*

### § IV.

Varias deliquiorum species et gradus statuminant Auctores, illorumque alii tres, alii vero quatuor numerant. *Qualis specie et gradu.*  
BOERHAAVIVS <sup>a)</sup>) Lipothymiam, Lipopsychiam, Syncopen et Asphyxiam: WVCHERER <sup>b)</sup>) Eclypsin, Lipothymiam, Syncopen et Asphyxiam; FR. HOFFMANNVS <sup>c)</sup>) subitaneum viri-

a) Institut. Med. §. 829.

b) Patholog. pag. 106.

c) Med. rat. syst. Tom. IV. Part. IV. Cap. IX §. 4. p. 243.



virium lapsum naturalium, Lipothymiam et Syncopen, nominant. Omnes lipothymiam. ad mitiorem referunt gradum; syncopen vero ad graviolem, utpote quae pertinacior periculique plenior, ac interdum mortis imago nuncia; siquidem de hac tritum illud valet: Syncope e medio tollit, sc. viventium. Lipothymia vero rursus dispesci meretur in protopathicam et symptomaticam, idiopathicam et sympathicam. Praeter haec, a causis, spasmodica, plethorica, hypochondriaca, hysterica, febrilis, polyposa etc. itemque haemorrhagica et ab inanitione cognominari posset. Haec quae haemorrhagiis supervenit, symptomatica est et idiopathica, eaque partim spasmodica, partim ab inanitione nata.

§. V.

*Forma et  
signa.*

Eam vero refert formam faciemque, ex qua cognoscitur lipothymia. Quosdam, antequam languentes corruunt, impetit sensio quaedam anxia in praecordiis, vel caloris ascendentis perceptio, cum conscientia labascentium subito virium, atque periclitantis et quasi fugientis vitae; ideoque tremantes formidine conqueruntur, se male, immo pessime, se habere, atque his balbutientes collabuntur vernaculae verbis: Es werde ichen so tod = übel, so wehe, sie müßten sterben. Aliis simul vertiginē affectis aures tinniunt, oculique caligant. Nonnullos inopinantes corripit subitanea virium sensuumque fuga, corporisque casus. Omnibus genae, labia, facies cutisque pallent, sensus tam externi quam interni stupent, et remittuntur, oculi fixi vel retorti claritatem exuunt, atque ceu nebula obscurantur, manibus abiectis, reclinato capite, pedibusque concidentibus, prosteruntur in terram, inscii plane



plane, quid patiantur, aut quid cum illis agatur; obscure aut vix respirant, pulsus aut nullus, aut valde suppressus percipitur, fudor tepidus aut plane frigidus faciem perfundit; tandem post aliquot temporis momenta, reviviscente pulsu, altis suspiriis profunde inspirant, vel vomitu in aliquibus accedente oculos paullatim movent, et ad se redeunt, ignari praeteritorum quaerunt ex adstantibus, quaenam facta sint? ubi degant circumspiciunt, affirmantes, se placidissimo obdormivisse somno. Variant nonnihil hae affectiones pro diversis lipothymiae causis, hominumque ad eiusmodi passionem proclivitate. Syncope tamen ubique gravitate, duratione et periculo, lipothymiam antecellit. Quod haemorrhagiis supervenit animi deliquium, illud habet praecipui, ut decumbentes capite declivi homines citius ad se revertantur; illi vero, qui capite et corpore sustinentur erecti, aut brachiis aliorum suffulti trahuntur, tardius ad se redeant, immo rursus in recidivam incidant lipothymiam.

## § VI.

Multiplices adnotatae sunt causae et occasiones antecedentes, ex quibus lipothymia ortum traxit. Illarum quaedam referendae sunt ad abundantiam, congestionem et rarefactionem sanguinis; aliae vero ad defectum et exinanitionem humorum vitalium pertinent. Nec raro irritatio mentis, nervorumque molesta sensatio, et fluidi nervei influxus turbatus vel suppressus, in culpa versatur. Aliquando vitium haeret in corde ipso, quod aut spasmi affectum, aut ex atonia languens, aut

*Causae antecedentes et occasionales.*

B poly-

polypis obfessum, remoram circulari humorum motui obicit. Multis itaque modis lipothymiam provocari fida monstravit nec infrequens experientia. Nam modo plethora, ab aëre calidiore, aestu hypocaustorum vel balnei, motu corporis nimio, abusu spirituosorum volatiliū, affectuumque animi vehementia, imprimis irae ac terroris, nimium agitata, modo aspectus propinqui fulminis, mortis subitaneae amici, suppliciorum crudelium, casus ab alto, cruentarum operationum Chirurgicarum, recensio atrocissimorum facinorum, rumor incendiū, calamitatum nunciū, fragoris horrendi auditus, navigatio insueta per mare turbulentum, vectio in curru retrospiciente facie, visio spectrorum, nauseosorum imaginatio, odor graveolentium, immo suaviū, aliarumque rerum ex idiosyncrasia adversarum, ceu felis praesentis, esus casei, etc. modo fumus carbonum, venenae quaedam corrosiva, vaporosa, emetica et purgantia drastica, febris et cardialgia syncoptica, morbi maligni, pestilentes, exanthemata retrocessa, scorbutus, cruditates stomachi, huiusque repletio nimia, vermes, hypochondriaca et hysterica passio, pectoris nimia per thoraces constrictio; modo dolores acerbissimi, tortura, sectio calculi, canceri, membrorum amputatio, nervi punctura, laesio capitis et cerebri, luxatio, fractura, gravis ambustio; modo polypus cordis, huiusque spasmus consensualis, laesio, percussio, refrigerium, aëris e sanguine secessus, itemque scrobiculi cordis, stomachi et testiculorum contusio; porro dysenteria, cholera, hyperemesis, hypercatharsis, diarrhoea enormis, diabetes, hectica colliquativa, seminis nimia profusio, paracenthesis, vigiliae, inedia, nimia studiorum medi-  
ta-



tationumque intensio, ptyalismus modum excedens; denique haemorrhagiae a venae sectione, vulneribus, abortu, lochiis, mensibus ac haemorrhoidibus nimis, mictu et vomitu cruento, haemoptysi, sanguinisque e naribus profusione, si modum excedunt, aliaque, lipothymiam invitare solent.

### § VII.

Allegatae hae causae adeo diversae, licet ortu, forma, symptomatibus, eventu, nocendi modo et gradu, indicationibus et medendi methodo, non parum inter se differant; ad gignendam tamen lipothymiam in eo conveniunt, ut circularem sanguinis motum aliquandiu cohibeant. Sicuti enim praecipua huius morbi, vel symptomatis, ratio in suspensione virium vitae, ad constantiam actionum tam animalium, quam vitalium, et partim naturalium est posita; fulcrum autem et incitamentum vitae praeter partium legitimam constitutionem potissimum a continuato et aequali sanguinis circuitu dependet; ita nullum mihi superest dubium, quin proxima huius symptomatis causa resideat in eodem circulari humorum motu aliquandiu impedito, eoque aut interdum silente et subsistente, aut ad sustinendas actiones praecipue animales haud sufficiente. Testes sunt vita vacillans, pallor, sensus et motus suspensi, pulsus aut deficiens, aut obscurus et insufficiens ad exercendas viventium actiones. Quemadmodum autem partim ad cor, ceu primarium circuli organon, partim ad sanguinem, respicere oportet: ita obstaculum quoddam circuli, aut in corde, eiusque actione vel imminuta, vel intermit-

*Causa proxima.*

B 2

te,

te, nec non in nervis, cordis motum iuvantibus, aut in sanguine haereat, necesse est. In corde aut spasmus, et strictura, aut languor et atonia peccant. Vulnus enim eius gravisque laesio syncopen lethalem et repentinam mortem, non vero transeuntem lipothymiam infert. In sanguine culpam habent aut polypus, et qualitas infensa, aut quantitas vel excedens vel deficiens, eiusque motus vel nimius, vel interceptus, vel irregularis, ubi ex orgasmo, rarefactione, aëris secessu, spissitudine, tenuitate, acrimonia, affluxus redditur aut iusto impetuosior, aut tardior, transfluxus vero per cor et pulmones praepeditur. Consentientem habeo illustrem FRID. HOFFMANNVM, d) dum: *animi, inquit, deliquorum causa ab ipso cordis motu vel imminuto, vel prorsus cessante recte deducenda venit.* Idem de syncope statuit, dicens: *Syncope est motus cordis ad tempus sufflaminatio cum ingenti virium et tam animi quam corporis functionum defectu, ab impedito vel minus sufficiente liquidi spirituoosi per nervos et sanguinis probe temperati per vasa coronaria in musculosam cordis substantiam influxu dependens.* Differentiam lipothymiae a syncope in eo ponit, quod illa gradu minor sit, motusque cordis tantum nimium debilis, in syncope vero aliquandiu magis sit cessans.

### § VIII.

Hoc loco non in singulas excurram mediatas et antecedentes causas, nec disquiram, quot modis suscitetur animi deliquium. Tot enim inter se multum variantes causae, licet perdiffinitas et divergentes procedant vias, in unam tamen contendunt metam, et in communi atque proxima seu ultima lipothymiae ratione conveniunt. Eas potius nunc prosequar rationes prae-

*Ex haemorrhagiis in specie.*

(d) Med. rat. syst. Tom. IV. Cap. IX. §. IX, p. 246. et §. XIV, p. 249.



praecipuas, ex quibus haemorrhagiae animi deliquium proferant. Duplicem vero originem monstrat experientia. Notum enim est, aliquos a levi vulnere vel parca sanguinis emissionem, qua vix binae aut tres unciae e vena secta promanarunt, fieri lipothymicos. Hos iudico non tam a mera haemorrhagia, vasorumque inanitione, animo linqui, quam a peculiari potius nervorum sensibilitate, et ab imaginationis effectibus, scilicet terrore, metu, abhorrescentia doloris et cruoris, etc. adeo mente affici, ut aequalis humorum circulus ex spasmo aut tremore cordis consensuali turbetur ac aliquantisper cohibeatur. In his fluxus sanguinis aut non penitus desinit, aut citius cum animo revertitur. Ex adverso in aliis, forti animo viriumque constantia praeditis, itemque in feminis, uteri haemorrhagia affectis, ex larga sanguinis profusione non facile oritur lipothymia, nisi magna eius perdita fuerit copia. In his nimia vasorum depletio ex haemorrhagia accusari meretur. Hac praesente conditione, nemo non ex praecedentibus colliget argumentis, terrificum deliquii symptoma ex inanitione vasorum, sanguinisque inopia, suam traxisse originem. Venis enim praeter modum vacuis, atque corde haud sufficienter repleto, systole eius, ac distributio vitalis humoris, quo singulae animantur partes, omnino minuitur, aut plane deficit. Quamvis etiam modica, quae superest, cordique languenti infunditur, sanguinis portio in aortam dimittatur, haud tamen eadem sufficit, nec tanto propellitur impetu, quo carotides internae satis repleantur, adeo, ut humor vitalis iustam cerebri irrigationem, qua mentis praesentia sensuumque integritas et vigor sustinentur, praestare valeat. Hac ex penuria fieri nequit, ut fluidi nervei secretio et distri-



butio perseverent; sed inde potius evenit, ut sensuum motuumque officia eousque cessent, donec liberalior sanguinis ad cerebrum affluxus silentes vitae vires resuscitet. Notum enim est, lipothymicos citius in vitam et actiones reverti, dum in lectum repositi, aut in humum prostrati, capite declivi decumbunt. Ita nempe modica superstitis sanguinis quantitas, quae erecto corpore et capite ad cerebrum usque assurgere nequiverat, nunc ad horizontalem progressum pronior, cerebrum facilius intrat, illud rursus penetrans animum sensusque revocat. Hoc in decubitu corporis si aliquandiu perseverant fauciati, vitae notas recuperant, certiusque monstrant ac servant, quam ubi corpore et capite detinentur erecti. Idquod saepius se experitum esse affirmat *Riedlinus* e) ideoque suadet, ut illi, qui a venae sectione saepius tentantur lipothymia, lecto aut incumbant, aut eidem linquentes imponantur, quoniam hoc in corporis situ minus ista afficiantur passione, aut illa prehensi citius ad se redeant. Vidi ipsemet aliquoties feminas, ob nimiam et diuturnam uteri haemorrhagiam sanguine ferme exhaustas, quae toties quoties lectum mutaturae steterant erectae, illico in subitaneam inciderunt lipothymiam, simul vero, ac lecto rursus impositae decubuerant, in vitam animique praesentiam rediere, certo indicio, illis erectis et stantibus sanguinem non ad caput cerebrumque adscendisse, ideoque in animi deliquiis, ex gravi haemorrhagia natis, non congestionem humorum ad caput, sed sanguinis potius in cerebro inopiam et defluxum repentinum, quem pallor faciei conspicuus monstrat, ex causarum successione

e) *Linear. Med. Ann.* III. mens. april. Obs. IV. p. 214. 215.



ne in culpa versari. Nec dubito, eandem obtinuisse rationem deliqui in femina illa, cuius historiam § I praemisi.

§ IX.

Haemorrhagiarum, seu sanguinis e vasorum alveis profusionum, amplam heic exhibere delineationem, thematis ratio haud quidem postulat. Quodlibet tamen sanguinis profuvium, sive naturale sit, sive a morbo profectum, sive per violentas laesiones excitatum, sive ex consilio institutum, si modum excefferit, lipothymiam afferre valet, immo syncopen et mortem, si haemorrhagia fuerit immodica et incompefcibilis, qua nempe maior sanguinis quantitas effunditur, quam quae ad vitam recuperandam continuandamque requiritur. Nec interest, utrum ex arteriis, an vero ex venis, prodeat; dummodo sanguis non ex maioribus internisque vasis nimio flumine, eoque per artis opem haud coërcendo, prorumpat. Quapropter mirum non est, si a vulneribus, larga venae sectione, arteriotomia, amputatione artuum, canceri sectione, mensibus nimis, lochiis et haemorrhoidibus excedentibus, copioso mictu et vomitu cruento, nimia haemoptysi et haemorrhagia narium, ac uteri in abortu, partu, aut secundinarum retentione, ob nimiam sanguinis profusionem, lipothymiam ortam esse, passim Auctores referant. Pari ex ratione femina, cuius mentionem § I feci, ex diuturna maxillae inferioris haemorrhagia evasit lipothymica. Sine dubio arteriae maxillaris ramus internus, a congestione sanguinis dolorifica tumens, fuit laesus, cum balneator dentem evelleret. Ex abruptis enim dentis venulis pertinax adeo et diuturnum sanguinis stillicidium, quod re-

*Haemorrhagia  
quid? et  
qualis lipothymica?*

me-



media styptica eluderet, haud supervenisset. Illustris de Hal-  
 ler f) speciosum narravit exemplum hominis, qui ex vulnere arte-  
 riae dentis evulsi per haemorrhagiam XXXX libras sanguinis ami-  
 sit, et tamen diaeta pleniori probe refocillatus, haud magnam sani-  
 tatis jacturam fecit. Vidit spectatissimus Dominus Decanus  
 Doctor WEISSIVS feminam plethoricam, mensium obstru-  
 ctione laborantem, quae subitanea et inopinata lipothymia  
 affecta, et in terram prolapsa, copiosum grumofumque san-  
 guinem vomitu reiecit, eoque excreto statim ad se rediit. Idem  
 retulit mihi historiam de iuvene quodam robusto, qui e sca-  
 bie retropulsa in febrem continuam inciderat. Huic licet  
 tempestive sanguis e vena largiter fuisset subtractus, tanta  
 tamen die critico supervenit narium haemorrhagia critica, ut  
 demum animam ageret lipothymicus. Adventante vero animi  
 deliquio, fluxus sanguinis substitit, febris cessavit et remedio-  
 rum ope scabies cutim nunc repetens ex arte sanata, ae-  
 gerque sanitati et robori restitutus est. Multoties accidit,  
 ut parturientes, si placenta praemature ab utero divellitur,  
 aut post editum foetum retenta per aliquot dies in utero re-  
 moratur, ex nimia profusione alte rubentis et tenuioris san-  
 guinis, (quem vulgo das Herz = Geblüth vocant) gravi et fre-  
 quenti afficiantur lipothymia, hac vero praesente, floridi san-  
 guinis effluxus aliquandiu cesset. Sicuti vero alia haemor-  
 rhagiae species prae altera citius lipothymiam provocat: ita  
 quoque hominum alii in eandem magis aut minus natura in-  
 clinant. Praeter haec comperimus, lipothymiam in venae  
 sectio-

f) Referente G. E. Remo, in specim. inaug. - - §. 29. p. 63.



sectione rarius contingere, si ex vena minore per exiguum foramen sanguis tenuiore filo promanat, aut minor eius portio per intervalla temporis emittitur; ex adverso eos citius animo linqui, in quibus ex maiore vena latius incisa sanguis magna copia et impetu maiore simul prorumpit. Hinc paulatina et lenta sanguinis profusio, quae stillicidio accidit, etiam si temporis tractu multum cruoris perdatur, rarius lipothymicos reddit, quam larga et simultanea haemorrhagia.

### § X.

Quibus ex causis lipothymia ex haemorrhagiis oriatur, ex antecedentibus fatis patet. Qua vero ratione vicissim per lipothymiam cohibeatur haemorrhagia, e mutua causarum successione facile perspicimus. Effuso nempe liberalius sanguine, eodem liquore vena cava non satis repletur, latera huius vasis ampla, nunc flaccida, refluentem parcius sanguinem tardius urgent, nec expedite propellunt; fluminis celeritas et vis, quae auriculam dextram elevet, cordisque resistantiam superet, minuitur, eiusque ventriculi pulmonumque vasa haud sufficienter distenduntur; hinc pulsuum rhythmus filet, respiratio, circulus sanguinis, atque simul vitalitas, per aliquot temporis momenta suspenduntur, inde arteriae, praesertim carotides, vitali humore destitutae, non amplius micant, mentis praesentia, sensuum vigor, motuumque constantia intercipiuntur, arteriae si non inanitae prorsus, non tamen satis repletae, sanguinem non quaquaeversum distribuunt; affluxu sic cessante, et unda undam haud protrudente, arteriae minores corrugatae collabuntur et inanes, cruor in ostiis

*Quomodo  
Lipothymia  
sistat haemorrhagi-  
am.*

C

vul-



vulneris haerens nonnihil condensatur, atque glutine suo orificia ante hiantia, nunc spasma constricta, operit; ita haemorrhagia ab interveniente lipothymia sistitur, fane non ex consilio aut ficta intentione animae, ad cohibendum vel promovendum ex arbitrio sanguinis effluxum plane impotentis, sed potius ex mechanismo animali legibusque hydraulicis viventis corporis. Ad illustrandas eiusmodi mutationes apprime facit schema illud circuli sanguinis, quod Spectatissimus Dominus Decanus nuper expressit figura in dissertatione de dextro cordis ventriculo post mortem ampliore, quam publice sub eius praesidio defendendam suscepi, atque ad eandem perillustrandam benevolum Lectorem remitto.

### § XI.

*Illustratur  
experimentis.*

Mutua haec symptomatum successio sicuti naturae animalium convenit: ita per instituta experimenta confirmatur aequae, ac illustratur, qui fiat, ut sanguis ad locum, per quem exitum invenit apertum, largius confluat et profundatur. Saepius accidit, ut sanguis, qui a venae sectione vel vulnere primum parce fluxerat, et ferme guttatim exstillaverat, inventa semel exeundi via, dein copiosius prorumpat, altiusque profiliat; quinimo fit, ut deligatum licet venae vulnusculum, ab impellente tamen cruore sua sponte rursus rumpatur, atque haemorrhagia aliquoties revertatur, praecipue si arteria fuerit incisa. Adeo crescit congestio, et vasa contrahuntur vicina, ut confluxus ad ostium vasorum dirigatur apertum. Perplacuit mihi curiosum Doctissimi REMI g) experimen-

g) In specimine experimentorum circa circulationem sanguinis. Goetting.  
1752. edit. §. 28. Experim. 4. 5. 6. 8.



mentum, aliquoties repetitum. Vidit ille, una cum illustri HALLERO, in ranis, microscopio Lieberkubniano affixis, quibus venam ex mesentericis inciderat, statim omnem sanguinem venosum, contrariis vorticibus, et retrogrado rivo, celerrime ad vulnus undequaque confluisse, motumque circularem inde valde auctum esse. Vulnere dein corrugato et clauso, motus sanguinis lentior aequabilis et naturalis rediit, vasaque passim inania sanguine rursus repleta sunt. A venae sectione circulum sanguinis accelerari, ex crebris constat observationibus. Sat quoque notum est, post applicationem sanguiifugarum, his licet cruore fartis relapsis remotisque, suctionis tamen sensum, affluxum sanguinis et haemorrhagiam ex vulnusculeo exiguo triangulari diutius adhuc protrahi. Adeo affluxus sanguinis ad partem, et revulsio humorum per haemorrhagias institui solet, ut et circulus sanguinis, et mentis praesentia demum vacillent, humore vitali vel subito vel liberalius iusto profuso, ex qua evacuatione et circulo intercepto demum ipsa sistitur haemorrhagia.

## § XII.

Sicuti vero lipothymia, haemorrhagias excipiens, ex circulo sanguinis aut intercepto, aut minus sufficiente, oritur; ita cedit illa, hoc vel resuscitato, vel redintegrato. Dispicendum itaque, unde vasa, per haemorrhagiam praegressam ferme inanita, eam denuo recipiant sanguinis copiam, quae sufficiat ad cordis motum resuscitandum, atque ad ramos aortae, praesertim caroticos, sat irrigandos? Mirabilis certe est sanguinis per corpus distributio et circuitus. Nunquam omnis exhaustur

*Quomodo  
lipothymici  
ad se rede-  
ant.*



ritur funditus, sed in vasis minoribus minimisque, quae maximam diverticulorum partem constituunt, plurimosque continent humores, magna sanguinis restitat portio. Haec si tanta est, ut successive collecta undequaque ad venas maiores et in cavam spasmo corrugatam refluat, ac valvularum ope ad auriculam cordisque caveam dextram, calente adhuc et tremente vitali hoc viscere, remittatur; palpitationes eius motusque systolici et diastolici, (ad quos alternatim renovandos continuandosque cor natura proclivior pars est, quam alii muscoli) resuscitantur, sanguis ad pulmones pergat, hi rursus illo impleti suspiria commovent profunda et anxia, respirationis adminiculo sinistrum cor sanguine repletum, simulque palpitans, receptum largius humorem in aortam eiusque ramos propellit; ita vero redit circulus, irrigatur denuo cerebrum, revertuntur et vita et sensus, sensim evigilantes, alto antea tanquam somno sopiti, calor reviviscit, et lassitudo aliquandiu remanens reficiente potu victuque paullatim depellitur. Interea sanguinis copia, per antecedentem haemorrhagiam imminuta, grumis obturata et corrugata vulneris ostia perumpere et referare nequit. Ita vero cessant aequae animi deliquium ac sanguinis profluvium. Huc tam natura, quam artis solertia sua conferunt auxilia. E symptomatibus enim lipothymiam haemorrhagicam concomitantibus patet, sanguinem, in vasis minimis retardantem, ex his citius exprimi, eumque ad venas maiores, quo rursus impleantur, provehi. Nam pallet cutis, adest rigor et frigus vascula coarctans; in aliquibus convelluntur artus, eodemque reciproco motu reticularis musculorum vasculositas comprimitur, in aliis vomitus accedit, quo pectoris et abdominis



minis viscera concutiuntur; sic undequaque cruor ad vasa maiora remittitur et confluit. Denique adstantium hominum operosa officia vitam revocare intendunt, dum lipothymicos commovent, naribus et ori affundunt liquores spirituosos, nervinos volatiles, aut in eorum defectu aquam adspargunt frigidam, membra fricant, calore fovant, corpusque agitant, ut nervosum excitent systema his irritamentis ad oscillationem vasculorum minimorum resuscitandam accelerandamque, et ad revocandum circulum sanguinis, ad distributionem fluidi nervei, ipsamque vitam restituendam.

### § XIII.

Non quaelibet haemorrhagia per lipothymiam sistitur. Si *Limitatio.* enim modica est, atque e vulnere minimorum vasorum sanguis prodit; citra illam aut sponte sua finitur, aut ab impositis spleniis, et medicamentis stypticis applicatis, ope deligationis facile cohibetur. Quodsi vero vasa maiora, eaque interna, praecipue arteriosa, rumpantur vel sauciantur, nec sanguis prorumpens per artem coerceri possit; non lipothymia tantum levis, sed syncope et mors succedunt. Testantur id aneurismata interna rupta, *quorum exempla* h) LANCISIUS non pauca inter inopinas et occultas subitaneae mortis causas recensuit. Pari modo a vulneribus internis, in quibus vasa maiora incisa, discissa vel rupta sunt, item a ruptura lienis, uteri, vasorumque pulmonalium maiorum, atque cerebri internorum lethalis oritur haemorrhagia intrinseca. Idcirco in iis tantum haemorrhagiis, quae compescibiles sunt, nec absolute lethales, lipothymiae symptoma remedio esse potest.



§ XIII.

*Vsus.*

Insigne Dei est beneficium, ad servandam hominum vitam omnino utile, quod adeo mirabili artificio eorum corpus construxit, ut non urgentem solum sitim, ceu stimulum refarcientorum humorum, gravibus adiunxerit haemorrhagiis, sed etiam promptuarium quoddam sanguinis in vasis recondiderit minimis, e cuius penu novi scaturient vitae fontes. Ipsamet lipothymia, quae mortis imaginem refert, renascentis vitae aliquando autor est. Terrificum hoc symptoma interdum solatii vim praebet iis, qui salutarem eius praevident effectum. Quinimo evenit, ut experientissimi Medicorum in aliquibus morbis sanguinem ex incisa vena eousque mittendum suadeant, donec imminens animi deliquium ferocem illius retundat impetum. Hanc sanandi methodum instituit HIPPOCRATES in febribus inflammatoriis, et i) BOTALLVS hanc in rem amplius est commentatus. In aliquibus maniacis, in quibus tam virium quam vasorum plethora eminent, repurgato prius ventre, venae sectio ad deliquium usque facta furorem compescuit. In arteriotomia, sive illa ex consilio instituatur, sive casu contingat, eousque sanguinem mittendum suadent, l) donec animo linquntur. Subtracta enim sanguinis abundantia, haemorrhagiae recursus praevertitur, et vulnus citius coalescit. Galli audacter in morbis et vulneribus, cum calore febrili coniunctis, aliquoties repetunt missiones sanguinis, de climatis, temperamenti et victus ratione certi, quod sanguis eorum agilis et ad orgasmum proclivis, e vasis minimis, in quibus restagnans et collisus caloris excessum acuit, iteratis cruoris profusionibus ad vasa maiora expeditius re-

(i) Tract. de curat. per sanguinis missionem Cap. XXV. vid. oper. ej. p. 259.

(l) Dionis in chirurgia, demonstratione octava, p. 148.



remigret, et iusculis facile regeneretur nutrientibus; ea tamen prudentiores utuntur cautione, ut non simul et semel, nec ad lipothymiam usque larga copia sanguinem emittant, sed partitis vicibus eius reiterent ventilationes, quas et vires aegrotantis ferunt, et plethorae calorisque exsuperantia postulat. Imprudentes autem eorum, qui omnem sanandi vim in frequentatis sanguinis missionibus ponunt, iustam saepe normam transiliunt. Hinc indignabundus ridet et reprobatur D. Tissot <sup>(m)</sup> Chirurghi cuiusdam temeritatem his verbis: *Le Chirurgien se glorifie de diz, douze, quinze saignées, et assure, que la blessure étoit nécessairement mortelle, puisque tant de sang répandu n'a pas pu sauver le malade, pendant que c'est réellement cette profusion, qui l'a tué.* Non reiicienda, sed prudenter applicanda est PARACELSI <sup>(n)</sup> cautio et admonitio: ne in vulneratis haemorrhagia festinanter aut praemature sistatur, sed ad pondus suum fluere permittatur. Celeberr. IVNKERVS <sup>(o)</sup> limitatus istam Paracelsi sententiam bene monet: haemorrhagiam vulnerum non eo usque semper tolerandam esse, donec sponte subsistat; sufficientem tantum et notabilem requiri sanguinis depletionem, praecipue in plethoricis, iratis, inebritatis, alioque orgasmo incitatis, ne ex praematura illius suppressione nascens inflammatio gravius inferat curationis impedimentum. Si quando lipothymia vulneratum impetat; haec sanguinis fluxum moderabitur, aut plane sistet. Vulgus quidem maiorem venae sectioni efficaciam tribuit, si lipothymia eidem supervenerit. Haec vero opinio neque legis vim habet, neque securo semper

(m) Avis au peuple sur la santé §. 440. p. 317.

(n) Chirurgia Vulnerum Cap. XII. p. m. 79.

(o) In Chirurg., conspectu Tab. LIX, cautel. 1. 2, p. m. 408.



per probatur eventu. Nonnulli enim partim ob idiosyncrasiam, partim ob haemophobiam, perverso timoris imaginationisque affectu adeo percelluntur, ut vix una vel duabus sanguinis unciiis e pertusa vena emissis, animo linquntur, quinimo artuum patiantur convulsiones, sanguisque profluere ultro desinat. In timidis hisce hominibus, si necessitas largiorem exigit sanguinis missionem, iusta eius depletio aut non attingitur, aut cessante lipothymia recludenda deligatio, ut sufficiens dein prodeat cruoris quantitas. In aliquibus autem tantam offendimus animi forditudinem viriumque constantiam, ut non experiantur lipothymiam, nisi omnem fere profuderint sanguinem, et aut prosternantur mortui, aut viribus privati in gravem incidant morbum. Ideoque praesumta vulgi regula expectandae a venae sectione lipothymiae inter ambiguas atque ut plurimum erroneas eius pertinet sententias. Quodsi tamen aliquando lipothymia salutarem edat effectum; hunc suspenso paulisper et alterato sanguinis circulo, qui ex praegressa eius evacuatione evadit liberior minusque pressus, adscribendum esse censeo. Multis dum quoque experimentis confirmatur, lipothymiae sistendis haemorrhagiis utilitas; fieri potest, ut in omnibus sanguinis profusionibus, siue naturalibus, siue morbosis et violentis, dummodo modum non excefferint, refranandae haemorrhagiae interdum inserviat. Hinc illud symptoma neque semper pertimescendum, neque omnino negligendum esse iudico.

T A N T V M.

---



NOBILISSIMO DOM. CANDIDATO GMELINO

S. P. D.

D. IOH. NIC. WEISS,

H. T. FACULT. MED. DECANVS.

*Eam tandem attingis feliciter metam, quam TIBI, Clarissime DOM. CANDIDATE, olim praefixisti. Pharmaceutico enim studio, quod a puero didicisti, atque felici usu in praeclaris Germaniae, Alsaciae et Helvetiae, urbibus excoluisti, eum in finem es delectatus, ut cognitam TIBI redderes scientiam, quae addiscendae arti salutari multum omnino opitulatur, animumque praeparat, ut amplas profundasque Medicinae doctrinas minori imbibat negotio. Non Basileae tantum felicia Hygeiae posuisti fundamenta, sed Ingolstadii etiam eadem amplificasti, opera usus celeberrimorum Medicinae Professorum, quorum benevolentiam studiumque summa cum laude gratique animi contentione nobis depraedicasti. Eadem Viri Excellentissimi TE egregiis ornatum testimoniis dimiserunt inuiti, quoniam TE dignum laurea doctorali iudicarunt, promptique extiterunt, ad eandem TIBI tribuendam, nisi potestas Papalis, quam Clerus ceu supremam religiose suspexit, TIBI, Augustanae Confessioni addicto, obtulisset, ac si medici honores, quos Augustissimi Imperatores Academicis clementissime largiti sunt, non nisi solis fidei Romanae alumni illic possent concedi. Non fidei adversa res est medicina, nec uni adstricta religionis speciei, sed religiose tantum exercenda. Iam dum Licentiam adipiscendorum honorum academicorum apud nos nancisceris; non possum, quin TIBI, optimoque PARENTI TVO, de praemiis studiorum TVORVM congratuler, piaque vota nuncupem, ut celeberrimo Nomine Gmeliniano, quod inter Medicos eruditione claros dudum eminet, incitatus, nunquam non felicia artis salutaris augmenta proferas, et languentibus commodam praestans operam, famam Nominis augeas.*

*Vale.*

THE (2) 1947

THE (2) 1947

THE (2) 1947

THE (2) 1947

